



Rabu, 20 Nopember 2024

Ogen : Kejadin 29: 31-35



**Banci Mupus**



**E**nda me turi-turin kerna perbeben Lea, ndehara si la ikelengi Jakup tapi ipasu-pasu Tuhan alu anak-anak. Tuhan ngidah maka Lea labo ikelengi Jakup tapi Tuhan mereken maka Lea banci mupus. Lea i bas situasi sulit erkiteken Jakup lebih engkelengi Rahel janah perasan e erbansa Lea terluka. Tapi Tuhan ngidah kiniseran Lea ras nehken sada tindakan alu mereken anak-anak jadi tanda pasu-pasuNa.

Lea mahan gelar anakna si pertama Ruben si ertina, "Nggo idah Tuhan kiniseranku", alu arapen kenca ipupusna anakna e, perbulangenna Jakup banci engkelengi ia. Kenca si e, anakna si peduaken, Simeon, Lea pe tek maka Tuhan megiken kiniseranna sabap Jakup pe tetap la engkelengi ia. Alu ketubuhen anak peteluken, Lewi, Lea pe ngarap," gundari la banci lang erpelcikna perbulangenu teriket man bangku". Enda nuduhken perjuangan Lea guna ndatken pengakun ras keleng ate arah Jakup. Lea rukur maka alu mereken anak-anak man perbulangenna, ia pasti ndatken keleng ate ras perhatian si selama enda isurakenna. Tapi aminna pe ia ipasu-pasu alu pupus, perasan kosong ras kurang ikelengi tetap nge lit. I bas ketubuhen anak si peempatken, Juda, terjadi perubahan sikap i bas pusuh Lea. Ia lanai ngarap maka arah anak enda erbansa Jakup erkeleng ate bana, tapi ia ngerana," genduari kupuji Tuhan". Lea mengalihkan fokusna arah ndarami keleng ate Jakup ku pujin man Tuhan i bas kai si enggo ibereken Tuhan man bana. Enda me punca arah transformasi pusuh Lea. Arah diberu si putus asa erkiteken kurang ikelengi, ia jadi sekalak si ngatakan bujur ras puas i bas pasu-pasu Tuhan. Arah anak-anakna, Lea erlajar maka kebahagiaan ras kepuasan sejati labo reh arah keleng ate manusia tapi arah pasu-pasu ras perhatian Tuhan si setia.